

Sare nagusiko A-15, A-68 eta N-1 errepideak itxiarazi zituen atzo elurrak

Etxegarate eta Altube eta Irurtzun-Andoain autobideetan arazo larriak izan ziren atzo

Erredakzioa / Donostia

Euskal Herriko errepide sare nagusiko autobide inportanteenetako bi —A-68 eta A-15— itxi behar izan zituzten atzo arratsalde partean elurrak sortutako arazoengatik, eta lerro hauek idazteko orduan gainera, egoera gero eta txarragoa zen. Halaber, N-1 errepidea ere itxi behar izan zuten gauean, Etxegarate mendatean kamioiak ez aurrera ez atzera geratu zirelako.

LERROOK idazteko orduan Iruñea eta Donostia lotzen dituen A-15 autobideak itxita segitzen zuen, Gipuzkoako aldean hainbat kamioi bide erdian baitziren, elurrak harrapatuta, Belabietako tuneletik gertu. Bi norabideetan zegoen autobidea itxita, eta egoera «gero eta larriagoa» zela adierazi zion Ertzaintzak EGUNKARIARI. Nafarroako zatian, kamioiak ilaran gertzen hasi ziren Leitzako zerbitzugunearen inguruan, aitzinago ziren arazoek jakitun, Pagozelaiko zerbitzuguneko langile batek EGUNKARIARI adierazi zionez.

Bilbo eta Gasteiz lotzen dituen A-68 autobidea ere itxi behar izan zuten arratsalde partean, elurrak sortutako arazoek ondorioz, eta makinak lanean aritu ziren arren, ezin izan zuten egoera kontrolatu.

N-1 errepidea ere bi norabideetan itxi behar izan zuten, Etxegarate mendatean hainbat kamioi gurutzatuta geratu baitziren, ez aurrera ez atzera.

Halaber, Irun eta Iruñea bitartean, N-121 errepidean, Belate tunelaren inguruan arazoak gero eta handiagoak izan ziren gauean.

Mendate ugari itxita, batez ere Araban

Errepide nagusian ez ezik, bigarren mailako errepide sarean ere makina bat arazo izan ziren atzo egun osoan. Araban, mendate asko eta asko itxita egon ziren egun osoan. Esaterako, Altube, Opakua, Herrera, Zaldiaran Barazar, Azazeta eta Gasteizko mendateak itxita zeuden atzo lerroak idazteko orduan, eta hala egon ziren ia egun



JESUS DIGES-EFE

Lizarragako mendatean (Nafarroa) kateak behar ziren atzo ibiltzeko.

osoan. Halaber, Arlabandik igarotzeko kateak behar ziren.

Arabako bigarren mailako errepide sareko beste puntu askotan eragozpenak ziren elurra eta izotzaren ondorioz, esate baterako, Altubetik Gasteizera doan N-622 errepidean.

Bizkaian Orduña eta

■ ■ ■ A-15
errepidean egoera
gero eta larriagoa
zen atzo gauean,
Ertzaintzak
jakinarazi zuenez

Urkiola itxita egon ziren atzo eguneko ordu askotan, eta beste hainbat mendateetan arazoak egon ziren.

Gipuzkoan, Deskarga mendatea itxi egin zuten arratsaldean, eta gauak aurrera joan ahala beste hainbat mendateetan ere elur geruza gero eta handiagoa zen.

Nafarroako hainbat mendate ere itxita egon ziren atzo eguerditik aurrera. Esaterako, Belagoako eta Aralarko San Migelgo mendateak. Horiez gain, Lizarraga, Urbasa eta Meanoko mendateetan ere kateak behar ziren ibiltzeko, eta orduak aurrera joan ahala, gainera, egoera txartzen ari zen.

Bi pertsona hil dira Gallartan jazotako istripuan

■ Ezbeharra A-8 autobidean gertatu zen, arratsaldean

Erredakzioa / Bilbo

ATZO Euskal Herriko errepideetan gertatu zen ezbeharrik larrienean, bi pertsona hil ziren, Gallartan (Bizkaia). Istripua A-8 autobidean jazo zen, Bizkaitik Kantabriarako bidean, auto bat errepidetik irteten eta babes hesiaren kontra jo zuenean.

Istripua arratsaldeko 04:00ak aldera gertatu zen, eta errepidetik irteten zen autoaren barruan zihoazen bi pertsonak hilik gertatu ziren: D.L.C. 76 urteko Santurtziko gizonetza, eta MT.A.O 71 urteko emakume portugaletearra. Ezbeharra izan zen lekura, laster, suhiltzaileak, Ertzaintza eta sorospen zer-

bitzuetako kideak abiatu ziren, eta zaurituen bizitza salbatzeko ahalegina egin arren, ezin izan zuten deus egin. Ertzaintzak A-8 autobideko erre bat itxi behar izan zuen bide erdian geratu zen autoa kendu bitartean. Ondorioz, auto ilara luzeak gertatu ziren, arratsaldeko 18:00ak arte.

Bestalde, bi pertsona zauritu ziren Lezon (Gipuzkoa) izan zen auto istripuan. Gaintxurizketa mendatean bi autok elkar jo zuten, eta bi autoetako gidariak zaurituta gertatu ziren. M.A.L. 73 urteko erreteriarra, eta A.M.C.G. 73 urteko gizonetza zaurituta eraman zituzten ospitalera.



LUIS TEJIDO-EFE

Atzo Gallartan (Bizkaia) izandako auto istripu larrian bi lagun hil ziren.